

Ai 6 di avost
INTE TRASFIGURAZION DAL SIGNÔR
Fieste

Manifestazion anticipade de glorie dal Signôr e profezie dal so esodo al Pari, cheste celebrazion e met in lûs la dimension pascâl e escatologiche de liturgjie e di dute la vite cristiane. La peraule dal Signôr e prenunzie l'adozion a fîs di chei che, scoltant la peraule e lant daûr dal Fi benvolût, a deventin siei fradis (Lc 8,21) e a partecipin de trasfigurazion eterne. La fieste dai 6 di avost, in origjine celebrade in Orient, e fo slargjade a dute la Glesie dal pape Calist II (6 di avost dal 1457) a ricuart de liberazion di Belgrât (1456).

Antifone di jentrade cf. Mt 17,5

Tun nûl lusint si viodè il Spirtu Sant, si sintì la vôs dal Pari:
Chel chi al è gno Fi il preferît,
là che o ài metude dute la mî contentece: scoltaitlu.

Si dîs Glorie a Diu.

Colete

Diu, che inte Trasfigurazion gloriose di to Fi
tu âs confermât i misteris de fede cu la testemoneance dai paris
e in maniere mirabil tu âs prefigurade la perfete adozion a tiei fîs,
danus a nô, tiei fameis,
di scoltâ la vôs di to Fi il predilet
par jessi a part de sô ereditât eterne.
Lui che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Dn 7,9-10.13-14

Il so vistît al jere blanc come la nêf.

Dal libri dal profete Denêl
O jeri daûr a cjalâ
cuant che a puartarin sentis
e si sentà un vieli di dîs.
Il so vistît al jere blanc come la nêf
e i cjavaei dal so cjâf a jerin cjandits come la lane;
la sô sente e jere tant che vampis di fûc
e lis sôs ruedis tant che un fûc imborât.
Un flum di fûc al saltave fûr spissulant denant di lui.

Mil miârs lu servivin
e tancj miârs di miârs e jerin impilâts denant di lui.
Il tribunâl si sentà e a forin spalancâts i libris.

O cjalavi tes visions di vie pe gnot:
ve che sui nûi dal cîl
al vignive indenant come un Fi dal om;
al rivâ fintremai al vieli di dîs e lu faserin lâ fin devant di lui.
A lui i fo dade potence, fuarce e paronance
e ducj i popui, lis gjernaziis e lis lenghis lu servivin.
La sô potence e je une potence eterne
e la sô paronance e je une paronance eterne,
che no sarà mai fruçade.
Peraule di Diu.

SALM RESPONSORIÂL Dal Salm 96

R. E lûs su la sô muse la glorie dal Pari.
Il Signôr al regne! Che e gjoldi la tiere,
che si indalegrin dutis lis isulis.
Nûl e scûr lu invulucin,
justizie e dirit a son il çocul de sô sente. R.

Denant dal Signôr lis monts come cere si dislidin,
denant dal paron di dute la tiere.

I cîi a contin la sô justizie
e ducj i popui a restin pe sô glorie. R.

Tu sêts tu, Signôr,
l'Altissim sun dute la tiere,
puartât cetant di plui di ducj i dius. R.

SECONDE LETURE 2 Pi 1,16-19

Cheste vòs nô le vin sintude a vignâ jù dal cîl.

De seconde letare di san Pieri apuestul

Benedets, nô no us vin fat cognossi la potence e la vignude dal Signôr nestri Jesù Crist par vie che o jerin lâts daûr di storiis dadis dongje cun mistîr, ma parcè che o sin stâts testimonis cui nestris vòi de sô grandece.

Lui al à vût onôr e glorie di Diu Pari cuant che de gloriose maiestât i è rivade cheste vòs: «Chest al è gno Fi, il plui cjâr, e o soi tant content di lui».

Cheste vòs nô le vin sintude a vignâ jù dal cîl biel che o jerin cun lui su la mont sante. E cussì o vin une conferme ancjemò plui grande de peraule dai profetis, che o fasêts ben a tignîle cont tant che un lampion che al lûs tun lûc dut scûr fintremai che nol criche il dî e tai vuestris cûrs no jeve la biele stele.

Peraule di Diu.

CJANT AL VANZELI cf. Mc 9,7

R. Aleluia, aleluia.

Dal nûl sflandorôs si sintì la vòs dal Pari:
«Chel chi al è gno Fi il plui cjâr: scoltaitlu!»

R. Aleluia.

VANZELI **

An A Mt 17,1-9

La sô muse e deventà lusorose come il soreli.

Dal vanzeli seont Matieu

In chê volte, Jesù al cijolè cun se Pieri, Jacum e Zuan so fradi e ju menâ fûr di man, suntune mont alte. E al comparì denant di lôr trasfigurât: la sô muse e deventà lusorose come il soreli e lis viestis cjandidis come la lûs. E ve, ur comparirin Mosè e Elie tal at di fevelâ cun lui. Alore Pieri al cijapà la peraule e al disè: «Signôr, par nô al è biel stâ culì; se tu vuelis, o fasarai chi trê tendis, une par te, une par Mosè e une par Elie». Biel che al jere ancjemò daûr a fevelâ, ve che un nûl lusint ju invuluçà. E ve, dal nûl si sintì une vòs che e diseve: «Chel chi al è gno Fi il preferît, là che jo o ài metude dute la mè contentece; scoltaitlu». Sintint cussì, i dissepui a colarin cu la muse par tiere, spaventâts a muart. Ma Jesù si svicinà e ju tocjà disint: «Jevait sù; no stait a vê pôre!». E lôr, alçant i vòi, no vioderin nissun, dome Jesù. Intant che a dismontavin de mont, Jesù ur ordenâ: «No stait a fâ peraule cun nissun di ce che o vêts viodût, fin che il Fi dal om nol sarà resurît de muart».

Peraule dal Signôr.

An B Mc 9,2-10

Chel chi al è gno Fi il plui cjâr.

Dal vanzeli seont Marc

In chê volte, Jesù al cijolè daûrsi Pieri, Zuan e Jacum e ju menà fûr di man, dome lôr, suntune mont alte, là che si trasfigurà denant di lôr. Lis sôs viestis a deventarin lusintis e tant cjandidis che nissun lavandâr di chest mont nol rivarès a fâlis vignî cussì cjandidis. E ur comparirin Elie e Mosè, che a stavin cjacarant cun Jesù. Alore Pieri, cjapant la peraule, i disè a Jesù: «Mestri, ce ben che o stin culì! Fasìn trê tendis: une par te, une par Mosè e une par Elie». Par dî il vêr, nol saveve ce che al diseve, parcè che a jerin ducj cjamâts di pôre. Alore ur comparì un nûl blanc che ju invuluçà te sô ombrene; e dal nûl si sintì une vôs: «Chel chi al è gno Fi il plui cjâr: scoltaitlu!». E lôr, di un moment al altri, cjalantsi ator, no vioderin plui nissun, dome Jesù, di bessôl, che al jere cun lôr. Biel che a dismontavin de mont, Jesù ur comandà di no contâi a dinissun ce che a vevin viodût, fin che il Fi dal om nol fos risussitât dai muarts. Lôr a mantignirin la peraule, ma intant si domandavin un cul altri ce che al voleve dî resurâ dai muarts.

Peraule dal Signôr.

An C Lc 9,28-36

Biel che Jesù al jere daûr a preâ, la sô muse e cambià filusumie.

Dal vanzeli seont Luche

In chê volte, Jesù al cijolè cun se Pieri, Zuan e Jacum e al lè su la mont a preâ. Biel che al jere daûr a preâ, la sô muse e cambià filusumie e la sô vieste e deventâ cjandise e sflandorose. E ve che doi oms a vignirin a fevelâ cun lui: a jerin Mosè e Elie, comparîts te lôr glorie, e a fevelavin de sô partence che e stave par colmâsi a Jerusalem. Pieri e i siei compagns a jerin cjamâts di sium, ma a restarin sveâts e a vioderin la glorie e i doi oms che a jerin cun lui. Intant che chei si separavin di lui, Pieri i disè a Jesù: «Mestri, ce ben che o stin chi. O fasarin trê tendis, une par te, une par Mosè e une par Elie». Ma nol saveve ce che al diseve. E intant che al diseve chestis robis, al rivâ un nûl e ju taponâ. A cjaparin pôre cuant che a jentrarin tal nûl. Alore dal nûl e saltâ fûr une vôs che e diseve: «Chel chi al è gno Fi, l'elet, scoltaitlu!». A pene che la vôs e cessâ, Jesù al restâ di bessôl. Lôr a taserin e in chei dîs no i contarin nuie a di nissun di ce che a vevin viodût.

Peraule dal Signôr.

Cuant che cheste fieste e cole di domenie, si dîs O crôt.

Su lis ufiertis

Santifice, Signôr, i regâi che ti ufrin
cu la Trasfigurazion gloriose di to Fi
e, daspò di vénus smondeâts des maglis dai nestris pecjâts,
fasinus lûs cul to sflandôr.

Par Crist nestri Signôr.

Prefazi

Il misteri de Trasfigurazion

V. Il Signôr cun vualtris.

R. E ancje cun te.

V. Adalt i cûrs.

R. Ju vin viers il Signôr.

V. Vin agrât al Signôr nestri Diu.

R. Al è just e sacrisant.

Al è propit just e sacrisant, al covente e al dà salvece
vêti agrât simpri e dapardut,
Signôr, Pari sant, Diu onipotent e eterni:
midiant di Crist nestri Signôr.

Lui, denant dai testimonis sielzûts, al à palesade la sô glorie
e al à travanât cul so plui grant sflandôr
la sô forme corporâl in dut compagne a la nestre,
par gjavâ dal cûr dai siei dissepui il scandal de crôs
e declarâ che al sarès realizât tal cuarp di dute la Glesie
ce che al lusive in maniere straordinarie intal so cjâf.

Par chel, cu lis Virtûts dai cîi,
nô ti proclamîn saldo ca jù su la tiere
cjantant cence polse a la tô maiestât:

Sant, Sant, Sant al è il Signôr Diu di dut il mont...

Antifone a la comunion cf. 1 Zn 3,2

Cuant che Crist si sarà pandût,
nô o sarìn sul so stamp,
parcè che lu viodarìn come che al è.

Daspò de comunion

Il sostentament dal cîl che o vin ricevût, Signôr,
che nus trasformi sul stamp di chel
che, inte Trasfigurazion gloriose,
tu âs volût palessâ dut il so sflandôr.
Lui che al vîf e al regne tai secui dai secui.